

四庫全書

集部

欽定四庫全書

劉賓客文集卷二十

唐 劉禹錫 撰

傷我馬詞

馬龍類蓋健而善馳君子之所宜求為畧也故法求於力或逸而喜駭法求於和或乾而易仆由德稱者鮮焉曩予知善馬之難遭也不求于肆而于其鄉一旦果得陰山之阿蠖畧其形蕭蕭其鳴長顧遠視順而能力顧其軀非騫然而偉也雖士得以乘之始予被皂衣于朝

朝之人多四三其牡以迭馭子無兼焉水輟之淋瀝淖
途之汪洋結為确犖融為坳堂前有儔軻後有濡裳我
策垂空我鑣方揚振鬣軒昂矯如飛翔翹翹其雄也非
力而何烈火之具舉鈎膺之疊舞一蹊千趾駢比齟齬
彊者斯擠悍者斯怒我鞍如山我轡如組弭毛容與宛
若孤處靡靡其柔也非彗而何前日子子之獲譴于闕下
背商顏趣昭丘日中而踰舍修門之南非騎所宜夷則
沮如高則歔歔虎咆空林蹙闢荒飴風雨孤征簡書之

威俾予弗顛我馬馬依屑屑其勞也非德而何予至武
陵居沅水傍或踰月未嘗跨馬以故莫得伸其所長跼
蹐顧望兮頓其鎖韁飲斲日削兮精耗神傷寒櫪騷騷
兮瘁毛蒼涼路間躑躅兮逸氣騰驤朔雲深兮邊草遠
意欲往兮聲不揚墮然似不得其所而死故其嗟也兼
常初玄宗羈大宛而盡有名馬命典牧以時起居洎西
幸蜀往往民間得其種而蕃焉故良毛色者率非中土
類也稽是毛物豈祖於宛歟漢之歌曰龍為友武陵有

水曰龍泉遂歸骨于是川且弔之曰生于磧礪善馳走
萬里南來困丘阜青菰寒菽非適口病聞北風猶舉首
金臺已平骨空朽投之龍淵從爾友

口兵戒

余讀蒙莊書曰兵莫慘於志莫邪為下缺然知志士之
傷夫生也它日讀遠祖中壘校尉書曰口者兵也盡然
知言之為兵又慘乎志因博考前載極其兩端夫志兵
之薄人激烈抗憤不過無從容於世耳口兵之起其刑

渥焉繇是知吾祖之言為急作戒以書于盤盂五刃之
傷藥之可平一言成病智不能明人或懼兵道塗奔救
投方效技思恐其後人或懼譖比肩狐疑借有解紛毀
輒隨之故曰舌端之孽慘乎楚鐵夷竈誠謀執戈以驅
掩人誠智折筭以詈賢者誨子信其有旨發言之難伸
舌猶爾辯為詐媒默為德基玉櫝不啟焉能瑕疵讎麋
深居孰謂可嗤戒哉我口之啟爾心之門無為我兵當
為我藩以慎為鍵以忍為閤可以多食勿以多言

猶子蔚適越戒

猶子蔚晨跪于席端曰臣幼承叔父訓始句萌至于扶
疎前日不自意有司以名污賢能書又不自意被丞相
府召為從事重兢累媿懼貽叔父羞今當行乞辭以為
戒余曰若知彛器乎始乎斲輪因入規矩剡中廉外枵
然而有容者理臍質堅然後加密石焉風戾日晞不副
不聲五交反然後青黃之鳥獸之飾乎瑤金貴在清廟其
用也畧以養潔其藏也櫝以養光苟措非其所一有毫

髮之傷偶然與破甑為伍矣汝之始成人猶器之作朴
是宜力學為礱斲親賢為青黃睦僚友為瑤金忠所奉
為清廟盡敬以為羣慎微以為櫝去怠以護傷在勤而
行之耳設有人思被重霄而挹顙氣病無階而升有力
者揭層梯而倚泰山然而一舉足而一高非獨揭梯者
所能也凡大位未嘗曠故世多貴人唯天爵并者乃可
偉耳夫偉人之一顧踰乎華章而一非亦慘乎黥刑行
矣慎諸吾見垂天之雲在爾肩腋間矣昔吾友柳儀曹

嘗謂吾文雋而膏味無窮而炙愈出也遲汝到丞相府
居一二日襲吾文入謁以取質焉丞相吾友也汝事所
從如事諸父借有不如意推起敬之心以奉焉無忽

觀博

客有以博戲自任者速余觀焉初主人執握槩之器實
于廡下曰主進者要約之既揖讓即次有博齒二異乎
古之齒其制用骨觚稜四均鏤以朱墨耦而合數取應
期月視其轉止依以爭道是制也通行之久矣莫詳所

祖以其用必投擲故以博投詔之是日客抵骨于局且
祝之曰其來如趨其去如脫事先趨趨命中無蹉跌無
從彼呼無戾我恒分曹適迫自朝至于日中稷

稷吳也
穀梁

而率與所祝異焉客視骨如有情焉如或馮焉悉詈之
不泄又從而齧齧蹂躪之莫顧其十目之眙讓也乃曰
非子術之不工是朽骼者不予畀也請刷恥于奕棊主
人促命燭以續之驚神默計巧竭智匱主進者書勝負
之數于牘視其所喪又倍前籍焉觀者曰以夫人之禍

心亦將詬暴而抵牾矣既乃恬而不恤赧然有失鵠求身之色人咸異之子劉子曰先人者制人博投是已從人制於人枯暴是已二者豈有數存乎其間哉但處之勢異耳是知當局者易生嫌而退身者易為譽易生之嫌不足貶也易為之譽不足多也在辯其所處而已

觀市

由命士已上不入於市周禮有焉乃今觀之蓋有因也元和二年沅南不雨自季春至于六月毛澤將盡郡守

有志于民誠信而雩遂徧山川方社又不雨遂遷市于
城門之達余得自麗譙而俯焉輦下令之日布市籍者
咸至夾軌道而分次焉其左右前後班間錯跣如在闕
之制其列題匾榜揭價名物參外夷之貨馬牛有繡私
屬有閒在中笥者織文及素馬在几閣者彫彤及質馬
在筐筥者白黑巨細焉業于饗者列饗饕陳餅餌而苾
然業于酒者舉酒旗滌杯盃而澤然鼓刀之人設膏俎
解豕羊而赫然華實之毛畋漁之生交蜚走錯水陸羣

狀夥名入隧而分韞藏而待價者負挈而求沽者乘射
其時者奇贏以遊者坐賈顯顯行賈遑遑利心中驚貪
目不瞬於是質劑之曹較固之倫合彼此而騰躍之冒
良苦之巧言數量衡於險手杪忽之差鼓舌僇俾詆欺
相高詭態橫出鼓囂譁空烟埃奮羶腥疊巾屨嚙而合
之異致同歸雞鳴而爭赴日中而駢闐萬足一心恐人
我先交易而退陽光西徂幅員既移徑術如初中無人焉
隙地虛如雞犬烏鳥樂得腐餘是日倚衡而閱之三感

其盈虛之相尋也速故著于篇云

論書

或問曰書足以記姓名而已工與拙何損益於數哉荅
曰此誠有之蓋舉下之說爾非蹈中之說亦猶言居室
曰避燥濕而已言衣裳曰適寒燠而已言飲食曰充腹
而已言車馬曰代勞而已言祿位曰代耕而已今夫考
居室必以閨門豐屋為美筭衣裳必以文章道澤為甲
評飲食必以精良海陸為貴第車馬必以華輶絕足為

高干祿位必以重侯累封為意是數者皆不行舉下之
說奚獨於書也行之邪禮曰士依於德游於藝德者何
曰至曰敏曰孝之謂藝者何禮樂射御書數之謂是則
藝居三德之後而士必游之也書居數之上而六藝之
一也語曰飽食終日無所用心難矣哉不有博奕者乎
為之猶賢乎已是則博奕不得列於藝差愈於飽食無
所用心耳吾觀今之人適有面詆之曰子書居下品矣
其人必適爾而笑或訾然不屑詆之曰子握槊奕碁居

下品矣其人必赧然而媿或艷然而色是故敢以六藝
斥人不敢以六博斥人嗟乎衆尚之移人也問者曰然
則彼魏晉宋齊間亦嘗尚斯藝矣至有君臣爭名父子
不讓何哉荅曰吾始欲求中道耳子寧以尚之之弊規
我歟且夫信者美德也秦繆尚之而賢臣莫贖黃老者
至道也竇后尚之而儒臣見刑道德且不可尚矧由道
德以下者哉所謂中道而言書者何處之文學之下六
博之上材鈞而善者得以加譽遇一作過鈞而善者得以

議能所加在乎譽非實也不黷于賞所議在乎過非實也不紊于刑夫如是庶乎六書之學不堙墜而已乎

劉氏集畧說

子劉子曰五達之井百汲而盈科未必涼而甘所處之勢然也人之詞待扣而揚猶井之利汲耳始余為童兒居江湖間喜與屬詞者游謬以為可教視長者所行止必操觚從之及冠舉秀才一幸而中說有司懼不厭於衆亟以口譽之長安中多循空言以為誠果有名字益

與曹輩畋漁于書林宵語途話琴酒調詭一出於文章
俄被召為記室參軍會出師淮上恒磨墨於楯鼻或寢
止羣書中居一二歲由甸服升諸朝凡三進班而所掌
猶外府或官課或為人所倩昌言奏記移讓告諭奠神
志葬咸猥并焉及謫于沅湘間為江山風物之所蕩往
往指事成歌詩或讀書有所感輒立評議窮愁著書古
儒者之大同非高冠長劔之比耳前年蒙恩澤授以郡
符居海壖多雨慙作適晴喜躬曬書于庭得已書四十

通道爾自哂曰道不益焉用是空文為真可供醬豢
藥楮耳它日子壻博陵崔生關言曰某也鄴游京師偉
人多問丈人新書幾何且欲取去而某應曰無有輒媿
起於顏間今當復西期有以弭媿者繇是刪取四之一
為集畧以貽此郎非敢行乎遠也

名子說

魏司空王昶名子制誼咸得立身之要前史是之然則
書紳銘器孰若發言必稱之乎今余名爾長子曰咸允

字信臣次曰同龔字敬臣欲爾於人無賢愚於事無小大咸推以信同施以敬俾物從而衆說其庶幾乎夫忠孝之於人如食與衣不可斯須離也豈俟余勗哉仁義道德非訓所及可勉而企者故存乎名夫朋友字之非吾職也顧名旨所在遂從而釋之孝始於親終於事君偕曰臣知終也

奏記丞相府論學事

十一月七日使持節都督夔州諸軍事夔州刺史劉某

謹奏記相公閣下凡今能言者皆謂天下少士而不知
養材之道鬱堙而不揚非天不生材也亦猶不耕者不
歎廩庾之無餘非地不產百穀也伏以貞觀中增築學
舍千二百區生徒三千餘人時外夷上疏請遣子弟入
附于三雖者五國雖菁菁者莪育材之道不足比也今
之膠庠不聞弦歌而室廬圯廢生徒裒少非學官不欲
振學也病無貲財以給其用鯁生今有一見使大學立
富幸遇相公在位可以索言之禮云凡學官春釋奠于

其先師斯禮止于辟廱類官非及天下也今四海郡縣咸以春秋上丁有事孔子廟其禮不應於古且非孔子意也炎漢初定羣臣皆起屠販為公卿故孝惠高后之間置原廟於郡國逮孝元時韋玄成以碩儒為丞相遂建議罷之夫以子孫尚不敢違禮以饗其祖況後學師先聖之道而首違之乎祭義曰祭不欲數語云祭神如神在與其煩於舊饗孰若行其教道今夫子之教日頽靡而以非禮之祀媚之斯儒者所宜憤悱也竊觀歷代

無有是事皇家武德二年詔於國學立周公孔子廟四
時致祭貞觀十一年又詔修宣尼廟於兗州至二十年
許敬宗等奏乃遣天下諸州縣置三獻官其他如方社
敬宗非通儒不能稽典禮開元中玄宗饗學與儒臣議
繇是發德音其罷郡縣釋奠牲牢唯酒脯以薦後數年
定令時王孫林甫為宰相不涉學委御史中丞王敬從
刊之敬從非文儒遂以明衣牲牢編在學令是首失於
敬宗而終失於林甫習以為常罕有敢非之者謹按本

州四縣一歲釋奠物之直緡錢十六萬有奇舉天下之
郡縣當千七百不啻羈縻者不在數中凡歲中所出於
經費過四千萬適資三獻官飾衣裳飴妻子而已於尚
學之道無有補焉前日詔書許列郡守臣得以上言便
事今謹條奏某乞下禮官博士詳議典制罷天下縣邑
牲牢衣幣如有生徒春秋依開元敕旨用酒醴殿修脍
脯棗栗示敬其事而州府許如故儀然後籍其資半附
益所隸州使增學校其半率歸國庠猶不下萬計築學

室具器用豐簞食增掌故以備使令凡儒官各加稍食
其紙筆鉛黃視所出州率令折入學徒既備明經日課
繕書若干紙進士命讐校亦如之則貞觀之風粲然不
殊其它郡國皆立程督投綬懷璽棧樸華華良可詠矣
伏惟相公發迹咸自諸生其尊素王之道儀刑四方宜
在今日是以小生敢沿故事以奏記于左右姑舉其大
較至於證據纖悉條奏具之章下之日乞留神省察不
勝天願惶恐拜手稽首

澤宮詩

澤宮送士歲貢也晉昌唐如晦以信誼為良弓文學為
戢矢規爵祿猶衆禽密殼持滿遡風蜚繳者數矣有措
栝之妙而無雙鶴之獲報弓收視歸究其術繇是跡愈
屈而名愈聞君子益多之彼不由其術一幸而中者雖
懸貺在廷君子未嘗多也歲殫矣告予以西余為賦澤
宮一章庶見子之弓弗再張也已秩秩澤宮有的維鶴
祁祁庶士予以干祿彼鵠斯微若止若翔千里之差起

于毫芒我矢既直我弓既良依于高墉因我不臧高墉
伊何維器與時視之以心誰謂鵠微

魏生兵要述

余為書殿學士四年所與居皆鴻生彥士一旦詔下懷
吳郡章而東門下生咸惜是行且曰吳中富士必有知
書宜為太守所禮者及下車閱客籍森然三千有鉅鹿
魏生持所著書來謁曰不佞始讀書為文章凡二十年
在貢士中孤鳴甚哀卒無善聽者退而收視易慮伏北

窻下考前言成兵要十編度諸侯未遑是事將笈而西
求一言以生羽翼予取書觀之始自皇帝伏蚩尤至于
隋氏平江南語春秋戰國事最備磅礴下上數千年間
其擴摭評議無遺策用是以干握兵符貴人宜有虛已
而樂聞者子盍行乎吾知元侯上舍不獨善鷄鳴彈長
缺三五九九之伎顓之而已

救沈志

貞元季年夏大水熊武五溪鬪決于沅突舊防毀民家

躋高望之溟涔葩華山腹為坻林端如莎湍道駛悍不
風而怒崩嶷前邁浸淫旁掩柔者靡之固者脫之規者
旋環之矩者倒顛之輕而泛浮者硯磴之重而高大者
前卻之生者力音殫者弛形蔽流而東若木梯然有僧
愀焉誓於路曰浮圖之慈悲救生最大能援彼於溺我
當為魁里中兒願從三四輩皆狎川勇游者相與乘堅
舟挾善器維以修紒杙于崇丘水當洄洑人易真力凝
矚執用俟可而拯大凡室處之類穴居之彙在牧之羣

在豢之馴上羅黔首下逮毛物投乎洪濶致諸生地者
數十百焉適有犖獸如鴟夷而前攫持流枿首用不陷
隅目傍晚其姿弭然甚如六擾之附人者其徒將取焉
僧趣音促訶之曰第無濟是為目之可里所而不能有所
持矣舟中之人曰吾聞浮圖之數貴空空生普普生慈
不求報施之謂空不擇善惡之謂普不逆困窮之謂慈
歸也生必救而今也窮見廢無乃計善惡而忘普與慈
乎僧曰甚矣問之迷且妄也吾之教惡乎無善惡哉六

塵者在身之不善也佛以賊視之未伽聲聞者在彼之未寤也佛以邪目之惡乎無善惡邪吾鼻也所援而出死地者衆矣形乾氣還各復本狀蹄者躑躅然羽者翹蕭然而言者譏譏然隨其所之吾不尸其施也不德吾則已烏能害為彼形之乾槩髣之姿也彼氣之還暴悖之用也心足反噬而齒甘最靈是必肉吾屬矣庸能躑躅譏譏之比歟夫虎之不可使知恩猶人之不可使為虎也非吾自遺患焉爾且將貽患于衆多吾罪大矣子

劉子曰余聞善人在患不救不祥惡人在位不去亦不
祥僧之言遠矣故志之

劉賓客文集卷二十

欽定四庫全書

劉賓客文集卷二十一

唐 劉禹錫 撰

雜興三十一首

學阮公體三首

少年負志氣，信道不從時。
只言繩自直，安知室可欺。
百勝難慮敵，三折乃良醫。
人生不失意，焉能慕己知。

朔風悲老驥，秋霜動驚禽。
出門有遠道，平野多層陰。
滅沒馳絕塞，振迅拂華林。
不因感衰節，安能激壯心。

昔賢多使氣憂國不謀身目覽千載事心交上古人侯
門有仁義靈臺多苦辛不學腰如磬徒使甑生塵

偶作二首

終朝對尊酒嗜興非嗜甘終日偶衆人縱言不縱談世
情閒盡見藥性病多諳寄謝嵇中散予無甚不堪

萬卷堆牀書學者識其真萬里長江水征夫度要津養
生非但藥悟佛不因人燕石何須辯逢時即至珍

古調二首

一作
諷古

軒后初冠冕前旒為蔽明安知從複道然後見人情
簿領乃俗士清談信古風吾觀蘇令綽朱墨一何工

寓興二首

常談即至理安事非常情寄語何平叔無為輕老生
世途多禮數鵬鷗各逍遙何事陶彭澤拋官為折腰

昏鏡詞

并引

鏡之工列十鏡于賈區發奩而視其一皎如其九霧如
或曰良苦之不侔甚矣工解順謝曰非不能盡良也蓋

賈之意唯售是念今來市者必厯鑒周睠求與己宜彼
皎者不能隱芒杪之瑕非美容不合是用什一其數也
予感之作昏鏡詞

昏鏡非美金漠然喪其晶陋容多自欺謂若他鏡明瑕
疵既不見妍態隨意生一日四五照自言美傾城飾帶
以紋繡裝匣以瓊瑛秦宮豈不重非適乃為輕

養鷄詞

并引

途逢少年志在逐獸方呼鷹隼以襲飛走因縱觀之卒

無所獲行人有常從事於斯者曰夫鷲禽饑則為用今
哺之過篤故然也予感之作養鷲詞

養鷲非玩形所資擊鮮力少年昧其理日夜哺不息探
雛網黃口旦莫有餘食寧知下韝時翅重飛不得毳毼
止林表狡兔自南北飲啄既已盈安能勞羽翼

武夫詞

并引

有武夫過詫余以從軍之樂翌日質于通武之善經者
則曰果有樂也夫威恣而賞勞則樂用威雄而賞武則

樂橫

去聲

顧其樂安出耳予惕然作是詞

武夫何洸洸衣紫襲絳裳借問胡為爾列校在鷹揚依
倚將軍勢交結少年場探九害公吏袖刃妬名倡家產
既不事顧眄自生光酣歌高樓上袒裼大道旁昔為編
戶人秉耒甘哺糠今來從軍樂躍馬飫膏粱猶思風塵
起無種取侯王

賈客詞

五方之賈以財相雄而鹽賈尤熾或曰賈雄則農傷予

感之作是詞

賈客無定遊所遊唯利并眩俗雜良苦乘時取重輕心
計析秋毫捶鉤倖懸衡錐刀既無棄轉化日已盈徵福
禱波神施財遊化城妻約雕金釧女垂貫珠纓高貲比
封君奇貨通倖卿趨時鷙鳥思藏鎚盤龍形大鰲浮通
川高樓次旗亭行止皆有樂關梁自無征農夫何為者
辛苦事寒耕

調瑟詞并引

里有富豪翁厚自奉養而嚴督臧獲力屈形削然猶役之無藝極一旦不堪命亡者過半追亡者亦不來復翁頽沮而追昨非之莫及也予感之作調瑟詞

調瑟在張弦弦平音自足朱絲二十五闕一不成曲美人愛高張瑤軫再三促上弦雖獨響下應不相屬日暮聲未和寂寥一枯木却顧膝上弦流淚難相續

讀張曲江集作并引

世稱張曲江為相建言放臣不宜與善地多徙五溪不

毛之鄉及今讀其文自內職牧始安有瘡瘍之歎自退
相守荆門有拘囚之思託諷禽鳥寄詞草樹鬱然與騷
人同風嗟夫身出於遐陬一失意而不能堪矧華人士
族而必致醜地然後快意哉議者以曲江為良臣識祿
山有反相羞凡器與同列密啟廷爭雖古哲人不及而
燕翼無似終為餒魂豈忤心失恕陰譴最大雖二美莫
贖邪不然何袁公一言明楚獄而鍾社四葉以是相較
神可誣乎予讀其文因為詩以弔

聖言貴忠恕至道重觀身法在何所恨色傷斯為仁良
時難久恃陰謫豈無因寂寞韶陽廟魂歸不見人

庭梅詠寄人

蚤花常犯寒繁實常苦酸何事上春日坐令芳意闌天
桃定相笑遊妓肯回看君問調金鼎方知正味難

詠古二首有所寄

車音想轉轉不見綦下塵可憐平陽第歌舞嬌青春金
屋容色在文園詞賦新一朝復得倖應知失意人

寂寂照鏡臺遺基古南陽真人昔來遊翠鳳相隨翔目
成在桑野志遂貯椒房豈無三千女初心不可忘

詠史二首

驃騎非無勢少卿終不去世道劇顛波我心如砥柱
賈生明王道衛綰工車戲同遇漢文時何人居貴位

苦雨行

悠悠飛走情同樂在陽和歲中三百日常恐風雨多天
人信遐遠時節易蹉跎洞房有明燭無乃酣且歌

萋兮吟

天涯浮雲生爭蔽
日月光窮巷秋風起
先摧蘭蕙芳
蕙貨列旗亭恣心注
明璫名高毀所集
言巧智難防
勿謂行大道
斯須成太行
莫吟萋兮什
徒使君子傷

經檀道濟故壘

萬里長城壞
荒營野草秋
秣陵多士女
猶唱白符鳩

史云

當時人歌曰
可憐白符鳩
枉殺檀江州

題敝器圖

秦國功成思稅駕晉臣名遂歎危機無因上蔡牽黃犬
願作丹徒一布衣

聚蚊謠

沈沈夏夜蘭堂開飛蚊伺暗聲如雷嘈然歛起初駭聽
殷殷若自南山來喧騰鼓舞喜昏黑昧者不分聰者惑
露花滴瀝月上天利嘴迎人著不得我軀七尺爾如芒
我孤爾衆能我傷天生有時不可遏為爾設幄潛匡牀
清商一來秋日曉羞爾微形飼丹鳥

百舌吟

曉星寥落春雲低初聞百舌間關啼花樹滿空迷處所
搖動繁英墜紅雨笙簧百轉音韻多黃鸝吞聲燕無語
東方朝日遲遲升迎風弄景如自矜數聲不盡又飛去
何許相逢綠楊路絲蠻宛轉似娛人一心百舌何紛紛
酡顏俠少停歌聽墜珥妖姬和睡聞可憐光景何時盡
誰能低回避鷹隼廷尉張羅自不關潘郎挾彈無情損
天生羽族爾何微舌端萬變乘春輝南方朱鳥一朝見

索漠無言萬下飛

飛鳶操

鳶飛杳杳青雲裏
鳶鳴蕭蕭風四起
旗尾飄揚勢漸高
箭頭若劃聲相似
長空悠悠霽日懸
六翮不動凝飛烟
遊鶻朔鴈出其下
慶雲清景相回旋
忽聞饑鳥一噪聚
瞥下雲中爭腐鼠
騰音礪吻相喧呼
仰天大赫疑鴛雛
畏人避犬投高處
俛吻無聲猶屢顧
青鳥自愛玉山禾
仙禽徒貴華亭露
櫟楸危巢向莫時
毡毳飽腹蹲枯枝

遊童挾彈一麾肘臆碎羽分人不悲天生衆禽各有類
威鳳文章在仁義鷹隼儀形螻蟻心雖能戾天何足貴

秋螢引

漢陵秦苑遙蒼蒼陳根腐葉秋螢光夜空寂寥金氣淨
千門九陌飛悠揚紛綸暉映互明滅金鑪星噴銓花發
露華洗濯清風吹攢昂不定招搖垂高麗眾恩照珠網
斜歷璇題舞羅幌暴衣樓上拂香帟承露臺前轉仙掌
槐市諸生夜對書北窓分明辯魯魚行子東山起征思

中郎騎省悲秋氣銅雀人歸自入簾長門帳開來照淚
誰言向晦常自明童兒走步嬌女爭天生有光非自銜
遠近低昂暗中見撮蚊祆鳥亦夜飛翅如車輪人不見

華山謠

洪鑪作高山元氣鼓其橐俄然神功就峻拔在寥廓靈
蹤露指爪殺氣見稜角凡木不敢生神仙聿來託天資
帝王宅以我為闕鑰能令下國人一見換神骨高山固
無限如此方為嶽丈夫無特達雖貴猶碌碌

摩鏡篇


流塵翳明鏡歲久看如漆門前負局生為我一摩拂革
開綠池滿暈盡金波溢白日照空心圓光走幽室山神
祇氣沮野魅真形出却思未摩時瓦礫來唐突

有獼吟

有獼得嘉魚自謂天見憐先祭不敢食捧鱗望清玄人
立寒沙上心專脰著肩漁翁以為妖舉塊投其前呼兒
貫魚歸與獼同烹煎關關黃金鶚大翅搖江煙下見盈

尋魚投身擘洪漣攫拏隱鱗去哺雛林岳巔鴟烏欲伺
隙遙噪莫敢前長居青雲路彈射無由緣何地無江湖
何水無鮪鱸天意不宰割非祭徒虔虔空餘知禮重載

在淹中篇



劉賓客文集卷二十一

欽定四庫全書

集部

劉賓客文集卷二十二至二十四

詳校官監察御史

臣邱文愷

檢討臣何思鈞覆勘

總校官進士

臣繆琪

校對官主事

臣龔敬身

謄錄監生

臣畢所誦

欽定四庫全書

劉賓客文集卷二十二

唐

劉禹錫 撰

五言今體三十首

春日退朝

紫陌夜來雨南山朝下看
戟枝迎日動閣影助松寒
瑞氣卷綃縠遊光泛波瀾
御溝新柳色處處拂歸鞍

經東都安國觀九仙公主舊院作

仙院御溝東今來事不同
門開青草日樓閉綠楊風
將

犬昇天路披霓赴月宮武皇曾駐驛親問主人翁

蜀先主廟

漢末詔黃牛白腹五銖當復

天下英雄氣千秋尚凜然勢分三足鼎業復五銖錢得
相能開國生兒不象賢淒涼蜀故妓來舞魏宮前

觀八陣圖

軒皇傳上畧蜀相運神機水落龍蛇出沙平鵝鵲飛波
濤無動勢鱗介避餘威會有知兵者臨流指是非

八月十五日夜玩月

天將今夜月一遍洗寰瀛暑退九霄淨秋澄萬景清
星辰讓光彩風露發晶英能變人間世翛然是玉京

許給事見示哭工部劉尚書詩因命同作

漢室賢王後

從叔望在河間

孔門高第人濟時成國器樂道任

天真特達圭無玷堅貞竹有筠總戎寬得衆市義貴能
貧護塞無南牧馳心拱北辰乞身來闕下賜告卧漳濱
榮耀初題劔清羸已抱紳宮星徒列位隙日不回輪自
昔追飛侶今為侍從臣素弦哀已絕青簡歎猶新未遂

揮金樂空悲撒瑟晨淒涼竹林下無復見清塵

從叔自渭北節

度以疾歸朝比及拜尚書竟不克中謝

奉和中書崔舍人八月十五日夜玩月二十

韻

莫景中秋爽陰靈既望圓騰精浮碧海分照接虞淵迥
見孤輪出高從倚蓋旋二儀含皎澈萬象共澄鮮整御
當西陸舒光麗上玄從星變風雨順日助陶甄遠近同
時望晶瑩此夜偏運行調玉燭潔白應金天曲沼疑瑤

鏡通衢若象筵逢人盡冰雪遇境即神仙引素吞銀漢
凝清洗綠烟臯禽警露下鄰杵思風前水是還珠浦山
成種玉田劔沈三尺影鎗罷九枝然象外行無迹寰中
影有遷稍當雲闕正未映斗城懸靜對揮宸翰閑臨襞
彩牋境同牛渚上宿在鳳池邊興掩尋安道詞勝命仲
宣從今紙貴後不復詠陳篇

奉和淮南李相公蚤秋即事寄成都武相公
八柱共承天東西別隱然遠夷爭慕化真相故臨邊並

進夔龍位仍齊龜鶴年

相公詩有齊年並進之句也

同心舟已濟造

膝壁常聯對領專征寄遙持造物權斗牛漆氣色并絡

靜氛烜獻可通三畧分甘出萬錢漢南趨節制趙北賜

山川玉帳觀渝舞虹旌獵楚田步嫌雙綬重夢入九城

偏秋與離情動詩從樂府傳聆音還竊抃不覺撫么弦

李中書自揚州見示詩本因命仰和

元和癸巳歲仲秋詔發江陵偏師問罪蠻徼

後命宣慰釋兵歸降凱旋之長率爾成詠

寄荊南嚴司空

蠻水阻朝宗兵符下渚宮前籌得上策無戰已成功漢
使星飛入夷心草偃同歡謠開竹棧拜舞擲桑弓就日
知冰釋投人念鳥窮網羅三面解章奏九門通卉服聯
操袂雕題盡鞠躬降幡秋練白驛騎畫塵紅火號休傳
警機橋罷亘空登山不見虜振旆自生風江遠烟波靜
軍回氣色雄佇看聞喜後金石賜元戎

武陵書懷五十韻

并引

按天官書武陵當翼軫之分其在春秋及戰國時皆楚地後為秦惠王所并置黔中郡漢興更名曰武陵東徙于今治所常林義陵記云初項籍殺義帝于郴武陵人曰天下憐楚而興今吾王何罪乃見殺郡民縞素哭于招屈亭高祖聞而義之故亦曰義陵今郡城東南亭舍其所也晉宋齊梁間皆以分王子弟事存于其書永貞元年余始以尚書外郎出補連山守道貶為是郡司馬至則以方志所載而質諸其人民顧山川風物皆騷人

所賦乃具所聞見而成是詩因自述其出處之所以然
故用書懷為目云

西漢開支郡南朝號戚藩四封當列宿百雉俯清沅高
岸朝霞合驚湍激箭奔積陰春暗度將霽霧先昏俗尚
東皇祀謠傳義帝冤桃花迷隱迹棟葉慰忠魂尸筭資
漁獵鄉豪恃子孫照山畚火動蹋月俚歌喧擁楫舟為
市連薨竹覆軒披沙金粟見拾羽翠翹翻茗折滄溪秀
蘋生枉渚暄

滄溪茶為邑人所
重枉渚近在郭東

禽驚格磔起魚戲唼喁

繁按本草經曰鷓鴣聲如鉤輻格磔者是也沈約臺榭故李衡墟落存隱侯臺木

奴洲並在湘靈悲鼓瑟泉客泣酬恩露變蒹葭浦星懸橘柚

村虎咆空野震鼉作滿川渾隣里皆遷客兒童習左言

炎天無冽井霜月見芳蓀清白家傳遺詩書志所敦列

科叨甲乙從宦出丘樊結友心多契馳聲氣尚吞士安

曾重賦元禮許登門草檄嫖姚幕巡兵戊巳屯築臺先

自隗送客獨留髯遂結王畿綬來觀衢室尊鳶飛入鷹

隼魚目儼璵璠曉燭羅馳道朝陽闕帝閣王正會夷夏

月朔盛旗幟獨立當瑤闕傳訶步紫垣按章清狴獄視
祭潔蘋蘩御厯昌期遠傳家寶祚蕃繇文光夏啟神教
畏軒轅內禪因天性膺圖授化元繼明懸日月出震統
乾坤太孝三朝備洪恩九族惇百川宗渤澥五岳輔崑
崙何幸逢休運微班識至尊校緡資筦榷復土奉山園

時以本官判度支鹽
鐵等兼崇陵使判官

一失貴人意徒聞大學論直廬辭

錦帳遠守愧朱幡集幕方猶燕搶榆尚笑鯢還回過荆
郢流落感涼溫旅望花無色愁心醉不昏春江千里草

莫雨一聲猿問卜安冥數看方理病源帶賒衣改製塵
澀劒成痕三秀悲中散二毛傷虎賁來憂禦魑魅歸願
牧雞豚就日秦京遠臨風楚奏煩南登無灞岸日夕上
高原

經伏波神祠

蒙蒙篁竹下有路上壺頭漢壘磨鰐鬚關蠻溪霧雨愁懷
人敬遺像閱世指東流自負霸王畧安知恩澤侯鄉園
辭石柱筋力盡炎洲一以功名累龔思馬少遊

聞董評事疾因以書贈

董生奉
內典

繁露傳家學青蓮譯梵書火風乖四大文字廢三餘
鼓枕晝眠晚折巾秋鬢疎武皇思視草誰許茂陵居

贈澧州高大夫司馬霞寓

前年收錦城馬蹋血泥行千里追戎首三軍許勇名
殘兵疑鶴唳空壘辨烏聲一誤雲中級南游湘水清

宿誠禪師山房題贈二首

宴坐白雲端清江直下看來人望金刹講席繞香壇
虎

嘯夜林動翼鳴秋澗寒衆音徒起滅心在淨中觀
不出孤峯上人間四十秋視身如傳舍閱世甚東流法
為因緣立心從次第修中宵問真偈有住是吾憂

晚泊牛渚

蘆葦晚風起秋江鱗甲生殘霞忽改色遊鴈有餘聲戍
鼓音響絕漁家鐙火明無人能詠史獨自月中行

罷郡歸洛陽閑居

十年江外守旦夕有歸心及此西還日空成東武吟花

間數殘酒月下一張琴聞說功名事依前惜寸陰

城東閑遊

借問池臺主多居要路津千金買絕境永日屬閑人竹
逕縈紆入花林委曲巡斜陽衆客散空鎖一園春

罷郡歸洛陽寄友人

遠謫年猶少初歸鬢已衰門閑故吏去室靜老僧期不
見蜘蛛集頻為儂句欺穎微囊未出寒甚谷難吹濩落
唯心在平生有已知商歌夜深後聽者竟為誰

陝川河亭陪常五大夫雪後眺望因以留別
與韋有布衣之舊一別二紀經遷貶而歸
雪霽大陽津城池表裏春河流添馬頰原色動龍鱗萬
里獨歸客一栢逢故人因高向西望關路正飛塵

途中蚤發

中庭望啓明促促事晨征寒樹鳥初動霜橋人未行水
流白煙起日上彩霞生隱士應高枕無人問姓名

初至長安

時自外郡
再授郎官

左遷凡二紀重見帝城春
老大歸朝客平安出嶺人
每行經舊處却想似前身
不改南山色其餘事事新

大和戊申歲大有年詔賜百寮出城觀秋稼
謹書盛事以俟采詩者

長安銅雀鳴秋稼與雲平
玉燭調寒暑金風報順成
川原呈上瑞恩澤賜閑行
欲及重城掩猶聞歌吹聲

蚤秋集賢院即事

時為學士

金數已三伏火星正西流
樹含秋露曉閣倚碧天
秋灰

瑄應新律銅壺添夜籌商飈從朔塞爽氣入神州蕙草
香書殿槐花點御溝山明真色見水淨濁煙收蚤歲忝
華省再來成白頭幸依羣王府有路向瀛洲

金陵懷古

潮滿冶城渚日斜征虜亭蔡洲新草綠幕府舊煙青興
廢由人事山川空地形後庭花一曲幽怨不堪聽

晝居池上亭獨吟

日午樹陰正獨吟池上亭靜看蜂教誨閑想鶴儀形法

酒調神氣清琴入性靈浩然機已息几杖復何銘

分司東都蒙襄陽李司徒相公書問因以奉

寄

蚤忝金馬客晚為商洛翁知名四海內多病一生中舉
世往還盡何人心事同幾時登峴首恃舊揖三公

奉和吏部楊尚書太常李卿二相公策免後

即事述懷贈答十韻

文雅關西族衣冠趙北都有聲真漢相無類勝隋珠當

軸龍為友臨池鳳不孤九天開內殿百辟看晨趨誠滿
澄敲器成功別大鑪餘芳在公論積慶是神扶步武離
台席徊翔集帝梧銓材秉秦鏡典樂去齊竽蕭灑風塵
外逢迎詩酒徒唯應待華皓更食萬錢厨

門下相公榮加冊命天下同歡忝沐眷私輒
敢申賀

冊命出宸衷官儀自古崇特膺平土拜光贊格天功再
佩扶陽印常乘鮑氏驄七賢遺老在猶得詠清風

病中一二禪客見問因以謝之

勞動諸賢者同來問病夫添鑪擣雞舌灑水淨龍顏身
是芭蕉喻行須叩竹扶醫王有妙藥能乞一九無

劉賓客文集卷二十二

欽定四庫全書

劉賓客文集卷二十三

唐 劉禹錫 撰

古調十六首

登司馬錯故城

秦昭王命錯征五溪蠻城在武陵沅江南

將軍將秦師西南奠遐服故壘清江上蒼煙晦喬木登
臨值蕭辰周覽壯前躅塹平陳葉滿墉高秋蔓綠廢井
抽寒菜毀臺生櫓穀耕人得古器宿雨多遺鏃楚塞鬱
重疊蠻溪紛詰曲留此數仞基幾人傷遠目

卧病聞常山旋師策勲宥過王澤大洽因寄

李六侍御

寂寂重寂寂病夫卧秋齋夜蟲思幽壁槁葉鳴空階南
國異氣候火旻尚昏霾瘴烟跼飛羽沴氣傷百骸昨聞
凱歌旋飲至酒如淮無戰陋丹水垂仁經藁街清廟既
策勲園丘俟燔柴車書一以混幽遠靡不懷逐客顛顛
久故鄉雲雨乖禽魚各有化予欲聞齊諧

謁枉山會禪師

我本山東人平生多感慨弱冠遊咸京上書金馬外結
交當世賢馳聲溢四塞勉修貴及蚤狙捷不知退錙銖
揚芬馨尋尺招瑕類淹留郢南鄙摧積羽翰碎安能咎
往事且欲去沈疴吾師得真如自在人案內哀我墮名
網有如翺飛輩瞳瞳揭智炬照使出昏昧靜見玄關啓
歆然初心會夙尚一何微今得信可大覺路明證入便
門通懺悔悟理言自忘處屯道猶泰色身豈吾寶慧性
非形礙思此靈山期未來何年載

善卷壇下作

在柱山上

先生見堯心相與去九有斯民既已治我得安林藪道
為自然貴名是無窮壽瑤壇在此山識者常回首

武陵觀火詩

楚鄉祝融分災火常為虞是時直突烟發自晨炊徒盲
風扇其威白晝曛陽烏操縵不暇汲循牆寧避踰怒如
列缺光迅與焚輪俱聯延掩四達赫奕成洪鑪洵疑雲
濤翻颯若鬼神趨當前迎焮赭是物同膏腴金烏入梵

天赤龍遊玄都騰烟透窻戶飛焰生藥爐火山摧半空
星雨灑中衢瑤壇被髹漆寶樹攢珊瑚花縣與琴焦旗
亭無酒濡市人委百貨邑令遺雙鳧餘勢下隈隩長燂
烘舳艫吹熒照水府炙浪愁天吳災罷雲日晚心驚視
聽殊高灰辨廩庾黑土連閨闔衆燼合星羅遊氛鏐人
膚厚地藏宿熟遙林呈驟枯火德資生人庸可一日無
御之失其道敲石彌天隅晉庫走龍劔吳宮傷燕雛五
行有沴氣先哲垂訐謨宋鄭同日起時當賢大夫無苛

自可樂弭患非所圖賢守恤人瘼臨烟駐驪駒弔傷色
慘怛言失詞劬愉下令蠲里布指期輕市租閭垣適未
立苦蓋自相娛山木行翦伐江泥宜瑾塗魯臣不必葺
何用徵越巫

崔元受少府自貶所還遺山薑花以詩答之
故人博羅尉遺我山薑花彩從碧海上來自謫僊家雲
濤潤孤根陰火照晨葩淨搖扶桑日豔對瀛洲霞世人
愛芳辛褰擷忘幽遐傳名入帝里飛駟辭天涯王濟本

尚味石崇方闔奢雕盤多不識綺席乃增華驛馬損筋骨貴人滋齒牙顧予藜藿士持此空嘆嗟

途中蚤發

馬蹋塵上霜月明岡頭路行人朝氣銳宿鳥相辭去流水隔遠村縵山多紅樹悠悠關塞內來往無閒步

和董庶中古散調詞贈尹果毅

昔聽東武吟壯年心已悲如何今淩落聞君辛苦辭言有窮巷士弱齡頗尚奇讀得玄女符生當事邊時借名

遊俠窟結客幽并兒往來長楸間能帶雙鞬馳崩騰天
寶末塵暗燕南垂燿火入咸陽詔徵神武師是時占軍
募插羽揚金羈萬夫列轅門觀射中戟支誓當雪國讐
親愛從此辭中宵倚長劍起視虫尤旗介馬晨蕭蕭陣
雲竟天涯陰風獵白草旗樂光參差勇氣貫中腸視身
忽如遺曾擒白馬將虜騎不敢追貴臣上戰功名姓隨
意移終歲肌骨苦他人印累累謁者既清宮諸侯各罷
戲上將賜北第門戟不可窺皆血下沾襟天高問無期

却尋故鄉路孤影空相隨行途里中舊襟邀昔所嗤一
言合侯王腰佩黃金龜問我何自苦可憐真數奇遲回
顧徒御得色懸雙眉翻然悞世途撫已昧所宜田園已
蕪沒流浪江海湄鷺禽毛翮摧不見翔雲姿衰容蔽逸
氣子子無人知寂寞草玄徒長吟下書帷為君發哀韻
若扣瑤林枝有客識其真潺湲涕交頤勸爾一杯酒陶
然足自怡

望衡山

東南倚蓋卑維嶽資柱石前當祝融居上拂朱鳥翮青
冥結精氣磅礴宣地脈還聞膚寸陰能致彌天澤

遊桃源一百韻

沅江清悠悠連山鬱岑寂回流抱絕巘皎鏡含虛碧昏

旦遞明媚烟嵐紛委積香蔓垂綠潭暴龍照孤磧

山下潭名

綠蘿磧名暴龍

淵明著前志子驥思遠蹠

子驥事見陶先生本記

寂寂無

何鄉密爾天地隔金行太元歲漁者偶探蹟尋花得幽
蹤窺洞穿閭隙依微聞雞犬豁達值阡陌居人互將迎

笑語如平昔廣樂雖交奏海禽心不憚揮手一來歸故
溪無處覓縣縣五百載市朝幾遷革有路在壺中無人
知地脈皇家感至道聖祚自天錫金闕傳本枝玉函留
寶歷禁山開祕宇復戶潔靈宅

詔隸二十戶免徭以奉灑掃

藥檢香

氛氲醺壇烟幕幕我來塵外躡瑩若朝醒折崖轉對翠
屏水窮留畫鷁三休俯喬木千級攀峭壁旭日聞撞鐘
綵雲迎躡屐遂登最高頂縱目還楚澤平湖見草青遠
岸連霞赤幽尋如夢想縣思屬空閒寅緣且忘疲耽玩

近成癖清猿伺曉發瑤草陵寒坼祥禽舞葱蘢珠樹搖
率璣羽人顧我笑勸我稅歸輓霓衣何飄颻童顏潔白
哲重巖是藩屏馴鹿受羈勒樓居邇清霄蘿薦成翠帟
仙翁遺竹杖王母留桃核姹女飛丹沙青童護金液寶
氣浮鼎耳神先生劒脊虛無天樂來僊宰鬼兵役丹丘
肅朝禮玉扎工紉繹枕中淮南方牀下阜鄉烏明鐙坐
遙夜幽籟聽淅瀝因話近世僊聳然心神惕乃言瞿氏
子骨狀非凡格往事黃先生群兒多侮劇謔言然不屑意

元氣貯肝鬲往往遊不歸洞中觀博奕言高未易信猶
復加訶責一旦前致辭自云仙期迫言師有道骨前事
嘗被謫如今三山上名字在真籍悠然謝主人後歲當
來覲言畢依庭樹如烟去無迹觀者皆失次驚追紛絡
繹日莫山逕窮松風自蕭槭適逢修蛇見瞋目光激射
如巖三清居不使恣搜索唯餘步綱勢八趾在沙磔至
今東北隅表以壇上石列仙徒有名世人非目擊如何
庭廡際白日振飛翮洞天豈幽遠得道如咫尺一氣無

死生三光自遷易因思人間世前路何湫窄瞥然此生
中善祝期滿百大方播羣類秀氣肖翕闢性靜本同和
物牽成阻阨是非鬪方寸董血昏精魄遂令多天傷猶
喜見斑白喧喧車馬馳冉冉桑榆夕共安緹繡榮不悟
泥途適紛吾本孤賤世業在逢掖九流宗指歸百氏旁
攬撫公卿偶慰薦鄉曲謬推擇居安白社貧志傲玄纁
辟功名希自取簪組俟揚歷書府蚤懷鈇射宮曾發的
起草香生帳坐曹烏集拍賜宴聆簫韶侍祠閱琮璽嘗

聞履忠信可以行蠻貊自迷希古心妄恃干時畫巧言
忽成錦苦志徒食藥平地生峯巒深心有矛戟曾波一
震盪弱植果淪溺北渚弔靈均長岑思亭伯禍來昧幾
兆事去空歎惜塵累與時深流年隨漏滴才能疑木鴈
報施迷夷跖楚奏繫鍾儀商歌勞甯戚稟生非懸解對
境方感激自從嬰網羅每事問龜策王正降雷雨環玦
賜遷斥儻復夷平人誓將依羽客買山構精舍領徒開
講席冀無身外憂自有閑中益道牙期日就塵慮乃冰

釋且欲遺姓名安能慕竹帛長生尚學致一溉豈虛擲
芝朮資糗糧煙霞拂巾幘黃石履看墮洪崖肩可拍聊
復嗟蜉蝣何頻哀虺蜴青囊既深味瓊葩亦屢摘縱無
西山姿猶免長戚戚

客有為余話登天壇遇雨之狀因以賦之

清晨登天壇半路逢陰晦疾行穿雨過却立視雲背白
日照其上風雷走于內澗瀼雪海翻槎牙玉山碎蛟龍
露鬚鬣神鬼含變態萬狀互相生百音以繁會俯觀羣

動靜始覺天宇大山頂自晶明人間已霽霈豁然重昏
斂渙若春冰潰反照入松門瀑流飛縞帶遙光泛物色
餘韻吟天籟洞府撞仙鐘村墟起夕靄却見山下侶已
如迷世代問我何處來我來雲雨外

有僧言羅浮事因為詩以寫之

君言羅浮上容易見九垓漸高元氣壯洶湧來翼身夜
宿最高峯瞻望浩無隣海黑天宇曠星辰來逼人
是時當朏魄陰物恣騰振日光吐鯨背劍影開龍鱗倏若萬

馬馳旌旗聳齋淪又如廣樂奏金石含悲辛疑其有巨
靈怪物盡來賓陰陽迭用事乃伴夜作晨咿喔天雞鳴
扶桑色昕昕赤波千萬里踴出黃金輪下視生物息靈
如隙中塵醢鷄仰斃口亦謂雲漢津世人信耳目方寸
度大鈞安知視聽外怪愕不可陳悠悠想大方此乃栖
水濱知小天地大安能識其真

秋江蚤發

輕陰迎曉日霞霽秋江明草樹含遠思襟懷有餘清凝

睇萬象起朗吟孤憤平渚鴻未矯翼而我已遐征因思
市朝人方聽晨鷄鳴昏昏戀衾枕安見元氣英納與耳
目變玩奇筋骨輕滄洲有奇趣浩蕩吾將行

裴祭酒尚書見示春歸城南青松塢別墅寄
王左丞高侍郎之什命同作

蚤宦閱人事晚懷生道機時從學省出獨望郊園歸野
約度春水山花映巖扉石頭解金章林下步綠薇青松
鬱成塢修竹盈尺園吟風起天籟蔽日無炎威危徑盤

羊腸連疊聳翬飛幽谷響樵斧澄潭環釣磯因高見帝
城冠蓋揚光輝白雲難持寄清韻投所希二公如長離
比翼翔太微含情謝林壑酬贈駢珠璣顧予久郎潛愁
寂對芳菲一聞丘中趣再撫黃金徽

和河南裴尹侍郎宿齋太平寺詣九龍祠祈
雨二十韻

有事九龍廟潔齋梵王祠玉簫何時絕碧樹空涼颼吏
散埃壒息月高庭宇宜重城肅穆閉澗水潺湲時人稀

夜復閑慮靜境亦隨朽懷斷黿足凝想乘鸞姿朱明盛
農節膏澤方愆期瞻言五靈瑞能救百穀萎咿喔晨雞
鳴闌干斗柄垂修容謁神像注意陳正詞驚颯起泓泉
若召雷雨師黑烟聳鱗甲灑液如焚絲豐隆震天衢列
缺揮火旗炎空忽淒紫高雷懸綆縻生物已霽霈濕雲
稍離披丹霞啓南陸白水含東菑熙熙飛走適藹藹草
樹滋浮光動宮觀遠思盈川坻吳公敏於政謝守工為
詩商山有病客言賀舒龐眉

冬夜宴河中李相公中堂命筚歌送酒

朗朗鵲雞弦華堂夜多思
簾外雪已深坐中人半醉
翠蛾發清響曲盡有餘意
酌我莫憂狂老來無逸氣

劉賓客文集卷二十三

欽定四庫全書

劉賓客文集卷二十四

唐 劉禹錫 撰

七言五十六首

西塞山懷古

王濬樓船下益州
金陵王氣黯然收
千尋鐵鎖沈江底
一片降幡出石頭
人世幾回傷往事
山形依舊枕寒流
今逢四海為家日
故壘蕭蕭蘆荻秋

陽山廟觀賽神

梁松南征至此遂
為其神在朗州

漢家都尉舊征蠻血食如今配此山曲蓋幽深蒼檜下
洞蕭愁絕翠屏間荆巫脈脈傳神語野老婆娑啟醉顏
日落風生廟門外幾人連蹋竹歌還

漢壽城春望

古荊州刺史治亭其下有子胥廟兼楚王故墳

漢壽城邊野草荒祠古墓對荆榛田中牧豎燒芻狗
陌上行人看石麟華表半空經霹靂碑文纔見滿埃塵
不知何日東瀛變此地還成要路津

後梁宣明二帝碑堂下作

玉馬朝周從此辭
園陵寂寞對豐碑
千行宰樹荆州道
莫雨蕭蕭聞子規

荊州道懷古

南國山川舊帝畿
宋臺梁館尚依稀
馬嘶古樹行人歇
麥秀空城澤雉飛
風吹落葉填宮井
火入荒陵化寶衣
徒使詞臣庾
開府咸陽終日苦思歸

朗州竇員外見示與澧州元郎中郡齋贈答
長句二篇因而繼和

鴛鴦差池出建章
綵旗朱戶鬱相望
新恩共理犬牙地
昨日同含雞舌香
白芷江邊分驛路
山桃蹊外接甘棠
應憐一罷金閨籍
枉渚逢春十度傷

蚤春對雪奉寄澧州元郎中

新賜魚書墨未乾
賢人暫屈遠人安
朝驅旌旆行時令
夜見星辰憶舊官
梅蘂覆階鈴閣煥
雪峯當戶戟枝寒
寧知楚客思公子
北望長吟澧有蘭

竇朗州見示與澧州元郎中蚤秋贈答命同

作

鄰境諸侯同舍郎並江蘭浦恨無梁秋風門外旌旗動
曉露庭中橘柚香玉簾微涼宜白晝金笳入暮應清蔭
騷人昨夜聞題鵠不歎流年惜衆芳

衢州徐員外使君遺以縞紵兼竹書箱因成

一篇用答佳貺

按此邵本自婺州
析置徐自台州還

爛柯山下舊仙郎列宿來添婺女光遠放歌聲分白紵
知傳家學與青箱水朝滄海何時去蘭在幽林亦自芳

聞道天台有遺愛人將琪樹比甘棠

唐秀才贈端州紫石硯以詩答之

端州石硯人間重贈我應知正草玄闕里廟中空舊物
開方竈下豈天然玉蟠吐水霞光靜綵翰搖風絳錦鮮
此日慵工記名姓因君數到墨池前

覽董評事思歸之什因以詩贈

幾年油幕佐征東却泛滄浪狎釣童
敲枕醉眠成戲蝶抱琴閑望送歸鴻
文儒自襲膠西相倚伏能齊塞上翁

更說扁舟動鄉思青菰已熟奈秋風

松滋渡望硤中

渡頭輕雨灑寒梅雲際溶溶雪水來夢渚草長迷楚望
夷陵土黑有秦灰巴人淚應猿聲落蜀客舫從鳥道回
十二碧峯何處所永安宮外是荒臺

揚州春夜李端公益張侍御登段侍御平仲
密縣李少府暘秘書張正字復元同會於
水館對酒聯句追刻燭擊銅鉢故事逢輒

舉觥以飲之逮夜艾羣公沾醉紛然就枕
余偶獨醒因題詩於段君枕上以志其事
寂寂獨看金燼落紛紛只見玉山頽自羞不是高陽侶
一夜星星騎馬回

逢王十二學士入翰林因以詩贈

時貞元二十年王以

藍田尉
充學士

廐馬翩翩禁外逢
星槎上漢香難從
定知欲報淮南詔
促召王褒入九重

闕下口號呈柳儀曹

綵仗神旗獵曉風
雞人一唱鼓逢逢
銅壺漏水何時歇
如此相催即老翁

監祠夕月壇書事

其禮
用晝

西皞司分晝
夜平羲和亭
午太陰生鏗
鏘揖讓秋光裏
觀者如雲出鳳城

戲贈崔子牛

學道深山虛老人
留名萬代不關身
勸君多買長安酒

南陌東城占取春

元和甲午歲詔書盡徵江湘逐客余自武陵
赴京宿於都亭有懷續來諸君子

雲雨江湘起卧龍武陵樵客躡仙蹤十年楚水楓林下
今夜初聞長樂鐘

江陵嚴司空見示與成都武相公唱和因命
同作

南荆西蜀大行臺幕府旌門相對開名重三司平水土

威雄八陣役風雷
彩雲朝望青城起
錦浪秋經白帝來
不是郢中清唱發
誰當丞相揆天才

徵還京師見舊番官馮叔達

前者忽忽襟被行
十年顛顚到京城
南宮舊吏來相問
何處淹留白髮生

故洛城古牆

粉落椒飛知幾春
風吹雨灑旋成塵
莫言一片危基在
猶過無窮來往人

元和十一年自朗州承召至京戲贈看花諸

君子

紫陌紅塵拂面來無人不道看花回
玄都觀裏桃千樹盡是劉郎去後栽

再遊玄都觀絕句

并引

余貞元二十一年為屯田員外郎時此觀未有花是歲
出牧連州尋貶朗州司馬居十年召至京師人人皆言
有道士手植仙桃滿觀如紅霞遂有前篇以志一時之

事旋又出牧今十有四年復為主客郎中重遊玄都蕩
然無復一樹唯兔葵燕麥動搖於春風耳因再題二十
八字以俟後遊時大和二年三月

百畝中庭半是苔桃花淨盡菜花開種桃道士歸何處
前度劉郎今又來

望夫石

正對和
州郡樓

終日望夫夫不歸化為孤石苦相思望來已是幾千載
只似當時初望時

金陵五題

并序

余少為江南客而未遊秣陵嘗有遺恨後為歷陽守跋
而望之適有客以金陵五題相示道爾生思歎然有得
他日友人白樂天掉頭苦吟歎賞良久且曰石頭詩云
潮打空城寂寞回吾知後之詩人不復措詞矣餘四詠
雖不及此亦不孤樂天之言爾

石頭城

山圍故國周遭在潮打空城寂寞回淮水東邊舊時月

夜深還過女牆來

烏衣巷

朱雀橋邊野草花
烏衣巷口夕陽斜
舊來王謝堂前燕
飛入尋常百姓家

臺城

臺城六代競豪華
結綺臨春事最奢
萬戶千門成野草
只緣一曲後庭花

生公講堂

生公說法鬼神聽
身後空堂夜不扃
高坐寂寥塵漠漠
一方明月可中庭

江令宅

南朝詞臣北朝客
歸來唯見秦淮碧
池臺竹樹三畝餘
至今人道江家宅

謝寺雙檜

揚州法雲寺謝鎮
西宅古檜存焉

雙檜蒼然古貌奇
含烟吐霧鬱參差
晚依禪客當金殿
初對將軍映畫旗
龍象界中成寶蓋
鴛鴦瓦上出高枝

長明鐙是前朝焰曾照青青年少時

韓信廟

將畧兵機命世雄蒼黃鍾室歎良弓遂令後代登壇者
每一尋思怕立功

秋夜安國觀聞笙

織女分明銀漢秋桂枝梧葉共颼颼月露滿庭人寂寂
霓裳一曲在高樓

洛中寺北樓見賀監草書題詩

高樓賀監昔曾登壁上筆蹤龍虎騰中國書流讓皇象
北朝文士重徐陵偶因獨見空驚目恨不同時便伏膺
唯恐塵埃轉磨滅再三珍重囑山僧

聞韓賓推第歸觀以詩美之兼賀韓十五曹

長時韓牧永州

零陵香草滿郊垌丹穴雛飛入翠屏孝若歸來呈畫讚
孟陽別後有山銘蘭陔舊地多纔結桂樹新枝色更青
為報儒林大人道如今從此賢星星

寄楊八壽州

風獵紅旗入壽春，滿城歌舞向朱輪。
八公山下清淮水，千騎塵中白面人。
桂嶺雨餘多鶴迹，茗園晴望似龍鱗。
聖朝方用敢言者，次第應須舊諫臣。

李賈二大諫拜命後寄楊八壽州

諫省新登二直臣，萬方驚喜捧絲綸。
則知天子明如日，肯放淮陽高卧人。

宣上人遠寄賀禮部王侍郎放榜後詩因而

繼和

禮闈新榜動長安
九陌人人走馬看
一日聲名徧天下
滿城桃李屬春官
自吟白雪銓詞賦
指示青雲借羽翰
借問至公誰印可
支郎天眼定中觀

贈東岳張鍊師

東岳真人張鍊師
高情雅澹世間希
堪為烈女書青簡
久事元君住翠微
金縷機中拋錦字
玉清壇上著霓衣
雲衢不要吹簫伴
只擬乘鸞獨自飛

祕書崔少監見示墜馬長句因而和之

麟臺少監舊仙郎洛水橋邊墮馬傷
塵汙腰間青蓋綬風飄掌上紫遊韁
上車著作應來問折臂三公定送方
猶賴德全如醉者不妨吟詠入篇章

寄楊虢州與之舊姻

避地江湖知幾春今來本郡擁朱輪
阮郎無復里中舊楊僕却為關外人
各繫一官難命駕每懷前好易沾巾
玉城山裏多靈藥擺落功名且養神

秋日題寶員外崇德里新居

實時判度支案

長愛街西風景閑，
到君居處暫開顏。
清光門外一渠水，
秋色牆頭數點山。
踈種碧松通月朗，
多栽紅藥待春還。
莫言堆案無餘地，
認得詩人在此間。

蒙恩轉儀曹郎，
依前充集賢學士，
舉韓湖州

自代因寄七言

翔鸞闕下謝恩初，
通籍由來在石渠。
暫入南宮判祥瑞，
還歸內殿閱圖書。
故人猶在三江外，
同病凡經二紀餘。

今日薦君嗟久滯不唯文體似相如

途次華州陪錢大夫登城北樓春望因觀李

崔令狐三相國唱和之什翰林舊侶繼踵華

城山水清高鸞鳳翔集皆忝夙眷遂題是詩

城樓四望出風塵見盡關西渭北春百二山河雄上國
一雙旌旆委名臣壁中今日題詩處天上同時草詔人
莫怪老郎呈濫吹官途雖別舊情親

三鄉驛樓伏觀玄宗望女几山詩小臣斐然

有感

開元天子萬事足唯惜當時光景促三鄉陌上望仙山
歸作霓裳羽衣曲僊心從此在瑤池三清八景相追隨
天上忽乘白雲去世間空有秋風詞

洛中初冬拜表有懷上京故人

鳳樓南面控三條拜表郎官蚤渡橋清洛曉光鋪碧簾
上陽霜葉翦紅綃省門簪組初成列雲路鴛鴦想退朝
寄謝殷懃九天侶槍榆水擊各逍遙

尉遲郎中見示自南遷牽復却至洛城東舊
居之作因以和之

曾遭飛語十年謫新受恩光萬里還朝服不妨遊洛浦
郊園依舊看嵩山竹含天籟清商樂水繞庭臺碧玉環
留作功成退身地如今只是暫時閒

洛中酬福建陳判官見贈

潦倒聲名擁腫材一生多故苦遭迴南宮舊籍遙相管
東洛閒門晝未開靜對道流論藥石偶逢詞客與瓊瑰

怪君近日文鋒利新向延平看劍來

始聞秋風

昔看黃菊與君別今聽玄蟬我却回五夜颼颼枕前覺
一年顏狀鏡中來馬思邊草拳毛動鵬盼青雲睡眼開
天地肅清堪四望為君扶病上高臺

和蘇十郎中謝病閑居時嚴常侍蕭給事同
過訪歎初有二毛作

清羸隱几望雲空左掖駕鸞到室中一卷素書銷永日

數莖斑鬢對秋風
菱花照後容
雖改著草占來命
已通
莫怪人人驚蚤白
緣君合是黑頭翁

訓淮南廖參謀秋夕見過之作

林公昔為揚州從事參謀

從釋子
反初服

揚州從事夜相尋
無限新詩月下吟
初服已驚玄髮長
高情猶向碧雲深
語餘時舉一杯酒
坐久方聞數處砧
不逐繁華訪閑散
知君擺落俗人心

題王郎中宣義里新居

愛君新買街西宅客到如遊郭杜間雨後退朝貪種樹
申時出省趁看山門前巷陌三條近牆內池亭萬境閑
見擬移居作鄰里不論時節請開關

訓朗州崔員外與任十四兄侍御同過鄙人
舊居見懷之什時守吳郡

昔日居鄰招屈亭楓林橘樹鷓鴣聲一辭御苑青門去
十見蠻江白芷生自此曾沾宣室召如今又守闔閭城
何人萬里能相憶同舍仙郎與外兄

任侍御子外兄崔
員外南宮同官

美溫尚書鎮定興元以詩寄賀

旌旗入境犬無聲
戮盡鯨鯢漢水清
從此世人開耳目
始知名將出書生

劉駙馬水亭避暑

千竿竹翠數蓮紅
水閣虛涼玉簾空
琥珀瓊烘疑漏酒
水精簾瑩更通風
賜冰滿盃沈朱實
法饌盈盤覆碧籠
盡日逍遙避煩暑
再三珍重主人翁

述舊賀遷寄陝虢孫常侍

南宮左輔
兩處交代

南宮幸襲芝蘭後左輔曾交印綬來多病未離清洛苑
新恩已歷望仙臺關頭古塞桃林靜城下長河竹箭回
聞道隨車有零雨此時偏動子荆才

訓端州吳大夫夜泊湘川見寄一絕

夜泊湘川逐客心月明猿苦血沾襟湘妃舊竹痕猶淺
從此因君染更深

劉賓客文集卷二十四

欽定四庫全書

集部

劉賓客文集卷二十五至
七

詳校官監察御史臣邱文愷

檢討臣何思鈞覆勘

總校官進士臣繆琪

校對官主事臣龔敬身

謄錄監生臣畢所誦

欽定四庫全書

劉賓客文集卷二十五

唐 劉禹錫 撰

雜體三十九首

翠微寺有感

吾王昔遊幸離宮雲際開朱旗迎夏畢涼軒避暑來湯
甃賜都尉寒冰頰上才能顛不可望玉坐生浮埃

連州臘日觀莫瑤獵西山

海天殺氣薄蠻軍部伍器林紅葉盡變原黑草初燒圍

合繁鉦息禽興大旆搖張羅依道口嗾犬上山腰猜鷹
慮奮迅驚鷹時跼跳瘴雲四面起臘雪半空銷箭頭餘
鵠血鞍傍見雉翹日莫還城邑金笳發麗譙

觀舞柘枝二首

長裾何歲蕤僊僊登綺墀神飈獵紅蕖龍燭然金枝岳
帶覆纖腰安鈿當嫵眉翹袖中繁鼓傾眸溯華棖燕餘
有舊曲淮南多冶詞欲見傾城處君看赴節時

山雞臨清鏡石燕赴遙津何如上客會長袖入華茵體

輕似無骨觀者皆聳神曲盡回身去魯波猶注人

君山懷古

屬車八十一此地阻長風千載威靈盡赭山寒水中

秋江晚泊

長泊起秋色空江涵霽暉莫霞十萬狀賓鴻次第飛古
戍見旗迥荒村聞犬稀軻峨舩上客勸酒夜相依

步出武陵東亭臨江寓望

鷹至感風候霜餘變林麓孤颿帶日來寒江轉沙曲戍

遙旗影動津晚榜聲促月上綵霞收漁歌遠相續

秋日送客至潛水驛

候吏立沙際田家連竹溪神林社日鼓茅屋午時雞
雀噪晚禾地蝶飛秋草畦驛樓宮樹近疲馬再三嘶

晚歲登武陵城顧望水陸悵然有作

星象承鳥翼蠻陬想犬牙俚人祠竹節仙洞開桃花城
基歷漢魏江源自賓巴華表廖王墓菜地黃瓊家霜輕
菊秀晚石淺水文斜樵音遠故壘汲路明寒沙清風稍

改葉盧橘如含葩野橋鳴驛騎叢祠發迥笳跳鱗避舉
網倦鳥寄行查路塵高出樹山火遠連霞夕暝轉赤岸
浮靄起蒼葭軋軋渡溪漿連連赴林鴟叫閣道非遠賜
環期自賒孤臣本危涕喬木在天涯

湖州崔郎中曾長寄三癖詩自言癖在詩與
琴酒其詞逸而高吟詠不足昔柳吳興亭
臯隴首之句王融書之白團扇故為四韻
以謝之

視事畫屏中自稱三癖翁管絃泛春渚旌旆拂晴虹酒
對青山月琴韻白蘋風會書團扇上知君文字工

為郎分司寄上都同舍

籍通金馬門身在銅駝陌省闥晝無塵宮樹遠凝碧荒
街淺深轍古渡潺湲石唯有嵩丘雲堪誇蚤朝客

登陝州城北樓卻寄京師親友

獨上百尺樓目窮思亦愁初日徧露草野田荒悠悠塵
息長道白林清宿烟收回首雲深處永懷帝鄉遊

請告東歸發灞橋卻寄諸僚友

征途出灞涘回首傷如何故人雲雨散滿目山川多
車無停軌流景同迅波前歡漸成昔感歎益勞歌

秋晚題湖城驛池上亭

秋次池上館林塘照南榮塵衣紛未解幽思浩已盈
風蓮墜故萼露菊含晚英恨為一夕客愁聽晨雞鳴

平蔡州三首

蔡州城中衆心死妖星夜落照壕水漢家飛將下天來

馬箠一揮門洞開賊徒崩騰望旗拜有若羣蟻驚春雷
狂童面縛登檻車大帛天矯垂捷書相公從容來鎮撫
常侍郊迎負文弩四人歸業閭里閑小兒跳跟健兒舞
汝南晨雞喔喔鳴城頭鼓角音和平路傍老人憶舊事
相與感激皆涕零老人收泣前致辭官軍入城人不知
忽驚元和十二載重見天寶承平時

九衢車馬渾渾流使臣來獻淮西囚四夷聞風失七筋
天子受賀登高樓妖童擢髮不足數血汗城西一坏土

南峯無火楚澤閒夜行不鎖穆陵關策勲禮畢天下泰

猛士按劍看常山

時唯常山不庭

平齊行二首

邊塵昔起薊北門河南地屬平盧軍
昭表代馬繞東岳嶧陽孤桐削為角
地形十二虜意驕恩澤含容歷四朝
魯人皆解帶弓箭齊人不復聞
蕭韶今朝天子聖神武手握玄符平九土
初哀狂童襲故事文告不來方震怒
去秋詔下誅東平官軍四合猶嬰城
春來羣鳥噪且驚

氣如壞山墮其庭牙門大將有劉生夜半射落攬槍星
帳中虜血流滿地門外三軍舞連臂駟騎回首過黃河
城中無賊天氣和朝廷侍郎來慰撫耕夫滿野行人歌
泰山沈寇六十年旅祭不饗生愁烟今逢聖君欲封禪
神使陰兵來助戰祆氛埽盡河水清日觀杲杲卿雲見
開元皇帝東封時百神受職爭奔馳千鈞猛簾順流下
洪波涵淡浮熊羆侍臣燕公秉文筆玉檢告天無愧詞
當今叡孫承聖祖岳神望幸河宗舞青門大道屬車塵

共待歲粧翠華舉

城西行

城西簇簇三叛族叛者爲誰蔡吳蜀中使提刀出禁來
九衢車馬轟成雷臨刑與酒栢未覆仇家白官先請肉
守吏能然董卓臍饑烏來覘桓玄目城西人散泰街平
雨洗血痕春草生

武昌老人說笛歌

武昌老將七十餘手把庾令相問書自言少小學吹笛

蚤事曹王曾賞激往年鎮戍到蘄州楚山蕭蕭笛竹秋
當時買林恣搜索典卻身上烏貂裘古苔蒼蒼封老節
石上孤生飽風雪商聲五音隨指發水中龍應行雲絕
曾將黃鶴樓上吹一聲占盡秋江月如今老去興猶遲
音韻高低耳不知氣力已無心尚在時時一曲夢中吹
西山蘭若試茶歌

山僧後檐茶數叢春來映竹抽新茸苑然為客振衣起
自傍芳叢摘鷹背斯須炒成滿室香便酌砌下金沙水

驟雨松聲入鼎來，白雲滿盃花叢回。
悠揚噴鼻宿醒散，清峭徹骨煩襟開。
陽崖陰嶺各殊氣，未若竹下莓苔地。
炎帝雖嘗未解煎，桐君有錄那知味。
新芽連拳半未舒，自摘至煎俄頃餘。
木蘭墜露香微似，瑤草臨波色不如。
僧言靈味宜幽寂，采采翹英為嘉客。
不辭緘封寄郡齋，甌井銅鑪損標格。
何況蒙山顧渚春，白泥赤印走風塵。
欲知花乳清泠味，須是眠雲跂石人。

廟庭偃松詩

并引

侍中後閣前有小松不待年而偃丞相晉公為賦詩美其猶龍蛇然植于高檐喬木間上欽旁軋盤蹙傾亞似不得天和者公以遂物性為意乃加憐焉命畚土以壯其趾使無敵素綯以牽其榦使不仆盥漱之餘以潤之顧眄之輝以照之發於仁心感召和氣無復天閼坐能敷舒鼎之跽蹙化為奇古故雖衰丈而有偃號焉予嘗詣閣白事公為道所以且示以詩竊感嘉木之逢時斐然成詠

勢軋枝偏根已危高情一見與扶持忽從顛顚有生意
卻為離披無俗姿影入巖廊行樂處韻含天籟宿齋時
謝公莫道東山去待取陰成滿鳳池

答東陽于令涵碧圖詩

并引

東陽令于興宗丞相燕國公之猶子生綺襦紉袴間所
見皆貴盛而挈然有心如山東書生前年白有司願為
親民官以自效遂補東陽及莅官以簡易為治故多暇
日一旦於縣五里偶得奇境埋沒於翳薈中于生自以

有特操而生於公侯家由覆簷入仕常忽忽歎息因移
是心開挾泉石艾去蘿薦斧凡材畚息壤而清溪翠巖
森立坐來因構亭其端題曰涵碧碧流貫于庭中如青
龍蜿蜒冰去聲澈射人樹石雲霞列于前昏旦萬狀惜其
居地不得有聞於時故圖之來乞詞既無負尤物予亦
久翳蘿薦者睹之慨然遂賦七言以貽後之文士

東陽本是佳山水何況曾經沈隱侯化得邦人解吟詠
如今縣令亦風流新開潭洞疑仙境遠寫丹青到雒州

落在尋常畫師手猶能三伏凜生秋

贈致仕滕庶子先輩

時及第人中最長

朝服歸來晝錦榮登科記上更無名壽觴每使曾孫獻
勝境長攜衆妓行矍鑠據鞍時騁健殷勤把酒尚多情

凌寒卻向山陰去衣繡郎君雪裏迎

時令子為御史主務在越中

詠樹紅柿子

曉連星影出晚帶日光懸本因遺採掇翻自保天年

庭竹

露滌鉛粉節風搖青玉枝依依似君子無地不相宜

臺城懷古

清江悠悠王氣沈六朝遺事何處尋宮牆隱嶙園野澤
鶴鷄夜鳴秋色深

題壽安甘棠館二首

公館似仙家池清竹迳斜山禽忽驚起衝落半巖花
門前洛陽道門裏桃源路塵土與烟霞其間十餘步

與歌者米嘉榮

唱得涼州意外聲
舊人唯數米嘉榮
近來時世輕先輩
好染顙須事後生

聽舊宮中樂人穆氏唱歌

曾隨織女渡天河
記得雲間第一歌
休唱貞元供奉曲
當時朝士已無多

渾侍中宅牡丹

徑尺千餘朵
人間有此花
今朝見顏色
更不向諸家

唐郎中宅與諸公同飲酒看牡丹

今日花前飲甘心醉數杯但愁花有語不為老人開

與歌者何戡

二十餘年別帝京重聞天樂不勝情舊人唯有何戡在
更與殷勤唱渭城

與歌童田順郎

天下能歌御史娘花前月底奉君王九重深處無人見
分付新聲與順郎

燕尔館破屏風所畫至精人多歎賞題之

晝時應遇空亡日賣處難逢識別人
唯有多情往來客
強將衫袖拂埃塵

賞牡丹

庭前芍藥妖無格池上芙蓉淨少情
唯有牡丹真國色
花開時節動京城

寄陝州姚中丞

時分司東都

八月天地肅二陵風雨收旌旗闕下來
雲日關東秋禹
跡想前事漢臺餘故丘
裴回襟帶地左右帝王州
留滯

悲昔老恩光榮徹侯相思望棠樹一寄商聲謳

奉酬湖州崔郎中見寄五韻

山陽昔相遇灼灼晨葩鮮同遊翰墨場和樂埵荒然一
落名宦途浩如乘風船行當衰莫日卧理淮海壖猶期
謝病後共樂桑榆年

劉賓客文集卷二十五